

CARLO ROBERTO MARIA REDAELLI

**Letare al cristian
da la domenie**

Editore Voce Isontina

*Preseât siôr Mario,
Zentîl siore Clare,*

o ai pensât di scrivii une letare. Sî, propi une letare come che si usave une volte, ancje se cumò si comuniche plui facilmentri cun e-mail, sms, messaç dai diviers *social network*. Forsi parcè che o soi un pôc a la antighe o forsi parcè che une letare e à une sô consistence ancje fisiche, e pues jessi lete e tornade a lei, e pues jessi metude te sachete o te borsete, e pues jessi ancje butade vie o e pues diventâ une presince cjare che si pues tornâi sù.

I scrîf propi a lui. Lui che al dêf jessi chel siôr su la sessantine ch'ò viôt spes quant che o dîs messe la domenie in domo, li tal ultin banc, atent e concentrât. O ai viodût lis sôs mans co al ven a fâ la Comunione: mans gruessis di contadin, al dêf vignî di fûr. O forsi lui al è che altri om plui zovin, su la cincuantine, simpri ben vistût. Si vin incrosât une volte sul treno, al veve une grande borse di piel. Mi à saludât cuntun mot. O stimi che al sedi un avocat: lu ai capît scoltant tocs dai siei colocuis cui clients (ah, la privacy suntun treno plen di int...). Ma forsi lui al è chel pari su la cuarantine, che o ai notât plui voltis in chê altre parochie dulà che mi capite di dî messe cualchi volte la domenie, un pari compagnât spes di chê che o imagjini ch'e sedi la femine, la mari, un pôc plui zovine di lui (mi pâr di vêle intraviodude une volte in ospedâl, e dêf jessi une infermiere...). Pari e mari di

**A cui ise destinate
cheeste letare?**

un fantacin di uns dîs agns che cualchi volte al fâs il zagut e di chê frute di cuatri agns, che spes e je cun lôr e che ogni tant e jes dal banc e si met tal mieç, te navade centrâl, pensant forsi di jessi la “princesse” da la glesie... Jê e pues jessi chê mari o ancje chê siore anziane – otante agns, o tenti, o forsi di plui (ma da lis “sioris” nol è il câs di permetisi nancje di imaginâ l’etât...) – simpri puntuâl a Messe: cjapielin ancje di Istât, golaine di perlis, borsete *vintage* (mi pâr che si disì cussì), ... une bisnone. O ancje chê fantate di pôc plui di vincj agns ch’e ven a Messe la domenie di sere. E dêf jessi une studentesse universitaria di fûr: cualchi volte – il treno forsi al è rivât in rìrtart... – e ven a Messe strissinant un *trolley*.

Parcè aio decidût di scrivii propi a lui? Parcè che lui al è un “cristian o cristiane da la domenie”. Nol è nuie di ironic o tant mancùl di ofensîf in cheste definizion. No corispuint ciert a chê di “autist da la domenie”. Mi ricuardi une vore ben co di fantaçut o osservavi incuriosît lis manovris da la domenie di un siôr che al stave di cjase un pâr di plans sot di nô (o vivevi alore a Milan). La domenie al lave fûr dal porton cun regolaritât tor lis 9 par lâ sot lis plantis dal viâl là ch’e jere parcade la sô auto, taponade cuntun telon grîs cul numar di targhe piturât parsore (cuintri i laris). Al pleave il telon e lu meteve tal baûl da la machine, i dave une netadine cuntun plumin a la carogârie lusinte là che a spicavin lis cromaduris da lis borduris (in chê volte i autos a je-

**L'autist
da la domenie...**

rin fats cussì), si meteve sù maneçutis traforadis, un improbabil cjapielut clâr cun frontin e si sentave tal puest di guide, al inviave il motôr, al spietave che si scjaldàs, al meteve la marcje cu la solite “gratade” e si butave di bot tal trafic dal viâl, lant indevant po a pôc plui di trente kilometris par ore compagnât dai improperis di cui che i vignive daûr sence rivâ a superâlu subit...

No, il “cristian da la domenie” nol è un cristian di serie B, un pôc imberdeât e ingjenui come un “autist da la domenie”. Il “cristian da la domenie”, il cristian che al frecuente in maniere regolâr o cuasi la Messe da la domenie e nol à impegn specificis in ambit eclesiâl (o sei nol è letôr, catechist, volontari da la caritas, ministri straordenari da la Comunione, membri dal consei pastorâl, ...) al è un cristian ad implen. Anzit, dal pont di viste statistic, al è chel plui facil di individuâ e plui utilizât par definî la religjositât da la popolazion. Un dât che di agns al è in calade fuarte, soledut se si riferissisi a scandais statistics che no si basin su lis declarazions dai intervistâts ma a fasin stât su la frecuece reâl: cumò in Italie uns 20% da la popolazion al va a Messe pardabon (e no si limite dome a dîlu sence po meti in pratiche la intenzion). In ogni câs un numar significatîf che al merte atenzion.

Une atenzion de bande mê – al è ben precisâ – “disinteressade”: che al stedi tranquil, cjâr siôr Mario, ch’e stedi tranquile, cjare siore Clare, no je mê intenzion proponii di

**Il cristian
da la domenie**

**Une letare
disinteressade**

deventâ letôr, membri dal coro parochiâl, catechist, operadôr dal centri di scolte da la caritas, assistent mesnar o une da lis tantis figuris che – par fortune – a son tes nestrîs parochiis. O sai che i plevans a son simpri che a cirin chestis disponibilîtats e forsi al è capitât ancje a lui di jessi ripiât sul porton da la glesie dal plevan, un pôc sfladât par vêsi gjavât di presse i paraments da la Messe, par sintîsi proponi – *“dal moment che lu viôt simpri presint a la nestre Messe ...”* – di deventâ apont letôr, catechist, corist o cuissà ce altri ancjemò. A diference dai plevans, che o amiri par la lôr condurance tal cirî jutoris di ogni gjenar oltri che pal lodevul impegn (pûr cu la diminuzion dal lôr numar e il cressi da la etât), come vescul no ai dibisugne in prime persone di “reclutâ” colaboradôrs. O soi duncje plui libar di fevelâ cun lui.

Parcè alore aio sintût un desideri fuart di scrivii? Par proponii di cjapâ cussience di jessi – e, se dal câs, di deventâ ancjemò di plui – un “cristian impegnât”. *«Viodût, o savevi che al jere il truc... ancje il vescul al vûl fidâmi un impegn e no domechel benedet om di don Pauli ...»*, o imagjini ch’è sedi la sô reazion. Une reazion di sigûr comprensibil ancje parcè che di vincj agns in ca, o forsi plui, te fevele ecclesiâl si à verificât un spostament di significât une vore impuartant e, secont me, di une cierte gravitât. Agns indaûr, in fat, co si fevelave di “cristian impegnât” si intindeve un crodint, om o femine, che al cirive di vivi secont il

**Un cristian
“impegnât”**

Vanzeli te societât, tal mont dal lavôr, da la scuele, da la universitât, da la politiche. Une persone ven a stâi ch'e podeve o ancje no vê incarics dentri da la comunitât cristiane, ma che si assumeve la sô responsabilitât di crodint, o sei di persone ch'e cîr di meti in pratiche il Vanzeli, li dulà ch'e viveve e e lavorave.

Di un pôc in ca, invezit, par "cristian impegnât" si intint cuasi dome la catechiste, il letôr a Messe, l'operadôr dal centri di scolte, e v.i. Al è facil intuî che si è tratât no dome di une modifiche di fevele ma di une tindince da la Glesie, forsi incussiente ma no par chest mancûl grave, di pleâsi su se stesse no ciert di jessi, come che al ame dî pape Francesc, une "Glesie in jessude".

Cheste constatazion no dêf fâ lâ al mancûl dut il rispîet, la considerazion e la ricognossince che bisugne vê par cui che si da da fâ in parochie o in altris realtâts di Glesie. Ancje lôr a son tra i destinatari di cheste letare: si puedin considerâ, in fat, cjapâts dentri te categorie dai "cristians da la domenie", tal sens che pûr par lôr la domenie e je fundamentâl. A chescj operadôrs pastorâi, però, ur son risiervadis specifichis propestis di cressite e di formazion.

Cun chest gno scrit no vuei, però, nancje proponii di jessi un "cristian impegnât" come che si intindeve agns indaûr. O vorès dome domandâi di jessi cristian e di jessi e di sintîsi cussì simpri. O cîr di spiegâmi miôr. No intint conseâi di lâ ator cuntune crosute picjade tor il cuel o cuntune spile su

**Jessi
semplicementri e
simpri cristian**

la gjachete e nancje di fermâ lis personis par strade par fevelâur di Jesù, e ancjemò di mancùl di distribuî imagjinutis. No si base su chest il jessi cristian: prime di un “fâ” alc al è une cuistion di “jessi”. O provi a fâ un esempi. Se si è un pari o une mari si sa une vore ben che di cuant che al è nassût il propri fi o il propri fi primarûl, la esistence e je cambiade. Di chel moment, voie o no voie, si è pari o mari. Sedi cuant che si cambie i panuçs dal frutin di pôcs mês, sedi cuant che si lu compagne a scuele, sedi cuant che si à di frontâ batais (pierdudis?) cul fi o la fie adolecent, sedi cuant che il fi o la fie a diventin grancj. Si è pari o mari par simpri: al è secondari che chest si pale-si in maniere esplicite o che al sedi un element implicit da la persone.

Cussì al dovarès sucedi pal so jessi cristian o cristiane. Cussì al è cuant che al/e ven in glesie di domenie, ma ancje cuant che si cjate in famee, sul lavôr, a scuele, in vacanze, cuant che si incuintre i amîs e lis amiis, tai moments di ricrei e in chei di lavôr, tai moments “sù” e in chei “jù”, tes fiestis e tai corots, ... Nol covente pavonâsi di cristian o fâ par fuarce alc, parcè che si lu è za, apont come che si è simpri pari o mari.

Si è cristians dal moment dal Batisim e no par nuie pape Francesc al invide spes a ricuardâ no dome la date di nassite (il complean), ma ancje chê che o sin diventâts fîs di Dio, partecipant a la Pasche di Jesù. O pensi che ancje lui, come la plui part dai catolics di cumò, al sedi stât batiât no tant

Il Batisim

timp dopo da la nassite par une sielte dai siei gjenitôrs. Il fat che lui al partecipi in maniere cuasi regolâr a la celebrazion da la domenie al lasse capî che diventant adult al à fat sô chê sielte in maniere plui o mancûl aprofondide: chel che al conte, però, al è che lui si consideri cristian.

Jessi cristian duncje al è alc che al fâs part da la persone stesse, no covente mostrâlu, ma no si pues nancje scuindilu. Alc che i tignin e che o volaressin che altris a vivesin. Alc di proponi a cui che nus sta dongje almancûl come che al ven spontani suggerî a un amî, a une amie il non di un brâf miedi, il recapit di une buteghe convenient, l'esistence di une buine scuele pai fîs... (e il Vanzeli al è une vore di plui di dut chest). Alc che al dovarès palesâsi in maniere spontanee cuant che si presente l'ocasion, ma che in ogni câs al dovarès in cualchi maniere risultâ simpri dal nestri mût di agjî e di jessi, dal nestri stîl di vite.

Ma ce vuelial dî jessi cristian e in maniere cussiente? Lâ a Messe di domenie? Preâ almancûl cualchi volte? Fâ cualchi at di caritât? Lei il Vanzeli? Ancje chest, e su chest o tornarin. Ma jessi cristian, vint cussience dal don ricevût tal Batisim, al è prin di dut vê capî e acetât che chel om Jesù, vivût doi mil agns indaûr, al è il Fi di Dio che nus à rivelât il sens da la vite: o sei che o sin in chest mont no par câs, ma parcè che al è un Pari che nus à clamât a la esistence, che nus

Alc che i tignin

Ce che al vûl di jessi cristian

vûl ben, che nus perdone, che al à prontât par nô un destin di felicitât eterne, che no nus lasse mai bessôî come fîs amâts; che chel che al conte al è acetâ chest amôr (che al è il Spirt Sant stes presint in nô) e vivilu a nestre volte dentri lis piçulis e grandis vicendis da la vite, dulà che o sin, e che su chest e sarâ judicade la nestre vite. Jessi cristian al è chest e cun dute probabilitât al vîf come cristian – ciert cun ducj i limits e i pecjâts che ducj o vin – ma al vîf come cristian. No i crodial? O provi a fâ cualchi esempi.

Pensin a dulà che al lavore lui (o jê): un ufici, une usine, un centri comerciâl, une aziende agricole, un grant studi di avocat, une scuele,... Che al provi a domandâsi: cuant che un so coleghe o une sô coleghe, un client, un student, un furnidôr, un dipendent, dut cûs cualchidun che lui al cognôs e ch'al frecuente il so lûc di lavôr, al à un probleme personâl (la malatie di un fi, un corot, in pinsîr par la salût), cuant ch'al à alc di biel di comunicâi a cualchidun (la spiete di un fi, une malatie che si è risolte, une promozion) cun cui si confidial? Cun lui. Aio induvinât? O pensi di sî. Ma parcè propi cun lui? Parcè lui isal la persone plui simpatiche, plui cordiâl, plui inmagant, plui a disposizion dal grup? Forsi sî o forsi no. Po stâi che al vedi il don di un biel caratar o forsi al dêf ricognossi di jessi une persone un pôc ruspiose, ch'e cîr ancje di miorâ, ma in fonts o restin simpri un pôc chel o sin... No, no je cuistion di caratar, di cordialitât,

**Tratâ lis personis
come... "personis"**

di carisme,... e je cuistion che par lui i coleghis, i clients, i dipendents, i sorestants, i arlêfs, i lôr gjenitôrs, e v.i. insome ducj a son coleghis, clients, dipendents, sorestants, e v.i. ma a son prin di dut personis. Personis di rispjetâ, di scoltâ, ancje di sopuartâ se al è il câs..., doprî un perauale impegnative: di amâ.

Lui nol à mai palesât chestis convinzions, ma i altris lu àn capît e par chest a vegnin ca di lui. A àn ancje capît che il fat che lui al sedi cristian e che al vadi in glesie (ancje se forsi lui no jal à mai dit, ma lis robis timp o tart po si san...) al jentre cul so mût di jessi e di agjî, al jentre cul so tratâ i altris come personis, cul so desideri di relazion. Ma ancje cu la sô coerence cun chei valôrs che lui i crôt (justizie, onestât, solidarietât, coretece, e v.i.), di là di ogni oportunitât, e plen di olse tal cjapâ posizion, massime a tutele dai debii.

In chest moment mi plasarès jessi devant di lui, pitost che scrivii, parcè che dialogâ, so-redut se fat cun cordialitât e disponibilitât, al jude tant a cognossisi. No dome a cognossi l'altri, ma ancje prin di dut a cognossi nô stes e a cressi. Se o fossin a chest pont sintâts tor di un taulin dal bar da la place grande bevuçant une bibite o se si cjatassin di face suntun treno a trate lungje, o sai che lui, cjâr siôr Mario, mi fasarès un pâr di obiezions. La prime: «*Va ben, siôr vescul (lu clami cussì parcè che no sai se si dîs “pari”, “reverent”, “eclence” ...), o vuei*

**Une obiezion
serie**

jessi onest cun lui e cun me stes. Mi à juste dit che il jessi cristian al è alc che al dovarès stâmi a cûr, alc che - se o ai capît ben - no “si fâs” e nancje “si vîf” parcè che “si è”. Alore, o dêf confessâi onestementri che, ciert, o voi in glesie ogni domenie (o cuasi ...), ma o voi parcè che mi àn insegnât cussì di piçul (o ai cincuante agns, in chê volte lis fameis i tignivin a insedâti ciertis abitudins...), mi plâs scoltâ une peraule buine, vê un pocje di recuie par pensâ a lis robis mês, ... insome co no voi o sint che mi mancje alc. Timp une setemane no i pensi plui. E rivuart a chel che lui al dîs sul sens da la vite, su Jesù Crist, sul amôr... sî, i pensi sù cualchi volte ancje cun serietât (lu ai fat la ultime volte – mal ricuardi ben – l’an passât co soi restât cualchi minût cidin dongje la casse di gno pari te cjamare mortuorum di un hospice), ma po la vite – saial come ch’e je... – si è cjapâts, sot pression par tantis robis,... Come ch’al viôt, o soi propi un “cristian da la domenie”».

No puedi che dâi rason. O vin ducj, oms e feminis, une vite pardabon frenetiche. Si dêf partî buinore, dismovi i fruts, compagnâju a scuele, po cori al lavôr – graziant il Signôr ch’al è... – e li fâ dut di presse. Al è di finî il toc, rispietâ lis datis di consegne, rispuindi al client rabiât, sopuartâ l’ironie dal coleghe invidiôs, lis paturniis dal sorestant... Po tu rivis a cjase di sere simpri plui tart. Ancje tô femine (o to marît) e rive cuasi a ore di cene, strache e gnervose che mai. Si mangje cu la television impiade:

Une vite frenetiche

dome notiziis di muarts e di fats di sanc. Tu ti metis sul divan a scoltâ i fîs che ti contin da la scuele e a barufâ cul fi adollesent che al vûl stâ fûr a straoris. E po la preocupazion par la mari anziane ch'e je restade vedue – bisugne badâ ancje a jê – e podopo il barbe di otantecinc agns che no si è sposât e ch'al è bessôl e nol vûl nissun... Simpri di corse: il pericol, pardabon reâl, al è che no si vedi mai il timp par pensâ al sens da la proprie vite, pensâ a se stes, a cui che si è, a ce che si sta a fâ tal mont.

Ancje cui che al è za in pension spes nol à une vite cuiete cun tant timp libar, tra nevoduts di viodi, la mari novantine di badâ, la cjase di tignî in ordin, lis visitis medichis di prenotâ pal marît o la femine, un pôc di volontariât e cussì vie.

Alore ce si puedial fâ? Ciert jo mi consideri fortunât, come vescul o rivi in ogni câs a cjatâ timp par la riflession, par la preiere, ma a voltis nol è facil nancje par me. Ce puedio sugjerî? Dome di decidi di no lassâsi vivi a la zornade, ma di utilizâ i timps muarts che si presentin vie pal dî.

Forsi lui al va a vore in auto o magari cul treno. Al pues jessi util no impiâ subit la radio o metisi tes orelis i auricolârs cul volum da la musiche che ti sturnîs o metisi subit a lei la Gazzetta dello Sport o dâi une passade a cualchi setemanâl. Invezit si pues restâ cidins par cualchi minût, in concentracion, e dî sù une semplice preiere cu lis propriis peraulis par ringraziâ il Signôr da la zornade che i sta donant: pesante ciert, ma simpri

**Cualchi sugjeriment
sempliç**

un don. E po pensâ ai impegnis che lu spietin (a voltis une vore intrigôs), a lis personis ch'al incuintrarà (simpatichis o indisponentis) a lis preocupazions e a lis sperancis pai fîs. E dî al Signôr: “Dami une man” (e si pues dîjal cualchi volte ancje vie pal dî).

Compagn di sere co si torne cjase: sorepensâ a la zornade, lassâ deponi lis tensions e lis emozions dal lavôr (cussì si sarà ancje un pôc plui disponibii cu la femine o il marît e i fîs), ricuardâ lis musis da lis personis che si à incuintrât, tornâ a pensâ a lis situazions ben o mâl frontadis, prefigurâsi lis preocupazions ma ancje lis piçulis e veris consolazions che di li a pôc si cjataran in famee. E dî al Signôr: “*Grazie, perdonimi, judimi*”. Si pues ancje recitâ un Pari nestri, ricuardant di jessi “fi” di Cualchidun; magari un’Ave Marie a la Madone pensant al chel santuari benedet là che si lave za di fruts e ancjemò in dî di vuê (chês pocjîs voltis che si rive a passâ, si respire une arie di cjase). Si pues ricuardâ une frase dal Vanzeli che nus à straneât domenie stade (di scuindon dal plevan, si pues ancje “robâ” il sfoiet cu lis leturis ch’al è sul banc par tornâ a lei il Vanzeli vie pe setemane: il plevan al sarà content di dovênt ordenâ di plui...).

Sugjeriments banâi? Forsi, ma a judin. A judin a stâ un pôc cul Signôr e cun nô stes par visâsi dal sens dal nestri vivi e a fâ in mût che lis nestris zornadis no sedin un continui consumâ il timp cuasi in trance, dismovintsi ogni tant dome co al capite alc

di biel o plui spes di brut che al romp la monotonie di ogni dì.

La vite e va vivude di protagoniscj, no dovìn lassânuse sbrissâ aduès come se no nus apartignìs. E o dovìn reagjî a chê strane condizion dal om contemporani che nol rive plui a gjestî il so timp: la tecnologjie e dovarès judânus a vuadagnâ timp par noaltris e, invezit, si cjatìn a passâ lis oris davanti di smartphone, pc, tablet, television. E o trascurìn il desideri che ducj, crodints e no crodints, o vin tal cûr, almancul come nostalgjie, di dedicâ timp a la proprie interioritât.

O zonti un sempliç riferiment a la vite di Jesù: ce aial fat il Fi di Dio prime dai trente agns? O sei prime di scomençâ la sô mission dopo dal batisim tal Jordan? Al à vivût une vite dal dut normâl come chê dai siei paisans (di fat co al torne a Nazaret sul principi da la sô mission, no puedin acetâ che un di lôr al sedi il Messie spietât): il lavôr come artisan (maringon o carpentîr), la frecence a la sinagoghe la sabide, il studi da la Biblie, lis fiestis in paîs par lis gnocis, pal racolt, par la vendeme o par circostancis religjosis, i corots, i pelegrinaçs anuâi a Jerusalem, lis preocupazions par la situazion sociâl e economiche. Trente agns butâts? Jesù aial vivût trente agns di vite cun pôc sens, come se la citât di Nazaret e fos stade une specie di “anticjamare” spietant che al rivàs il moment da la mission? O aial dât cussì un sens a la nestre vite normâl ai nestrìs dîs di vore?

**Nazaret e
la vite
cuotidiane**

Mi somee di vê capît che al voleve fâmi an-cje une seconde obiezion sul fat che i cristians si ricognossin di cemût che a tratin lis personis juste apont come personis, se a scoltin, se i dan une man e i vuelin ben a chei ch'a àn intorsi, se a vivin cun coeren-ce cierts valôrs. Lu scolti: *«I conti chel che al capite tal gno ufici. Il gno sorestant al è un ch'al va in glesie, ch'al è amî dai predi, ma al è simpri ruspi, al trate mâl lis personis, al è une vore intransigent, une vore dâr, preocupât dome dai siei solts. Cualchidun al sa ch'al va in glesie e al dîs: "Ve ca come a son i cristians... ducj fals". E je invezit une siore, ch'e lavore in segretarie, simpri une vore a la man e ridinte, discrete, ti scolte, ti da une man, ti sostituîs sence pratindi nuie, ... Une volte mi soi fermât a fevelâ cun jê, forsi e veve voie di sfogâsi: mi disè ch'e veve vût une brute esperience, parcè che cuant ch'e veve cutuardis agns al jere muart dut intun un fradut di cinc agns e si jere sintude sole sole, tradide di chel Dio che al varès dovût jessi bon; e veve decidût di no lâ plui in glesie. Duncje nol covente vê une fede par compuartâsi ben. Ce zontie in plui la fede?»*.

O soi sigûr ch'al varà scoltât cualchi volte in glesie il pas dal judizi universâl (lu pues tornâ a lei, al è tal cjapitul 25 dal Vanzeli secont Mateu). L'umanitât si cjatarà alore dividude in dôs categoriis, ma il judizi al sarà compagn par ducj, dome che a un grup Jesù al disarà: "O vevi fam, tu mi âs dât di

Une seconde obiezion

Il judizi

mangjâ; o vevi sêt e tu mi âs dât di bevi; o jeri pelegrin e tu mi âs dât sotet; o jeri nût e tu mi âs vistût; o jeri malât o in preson e tu sês vignût a cjatâmi”. A chel altri compagn, ma in negatîf: “O vevi fam e no tu mi âs dât di mangjâ; o vevi sêt e no tu mi âs dât di bevi; o jeri pelegrin e no tu mi âs dât sotet; o jeri nût e no tu mi âs vistût; o jeri malât o in preson e no tu sês vignût a cjatâmi”. Dutis dôs lis categoriis di personis a domandaran: “Cuant ti vino viodût plen di fam e di sêt, pelegrin, nût o malât o in preson?”. La rispueste e sarà: “O jeri jo chel plen di fam e sêt, o jeri jo il pelegrin, o jeri jo chel che al jere nût, malât, o in preson che ti domandave jutori”. Il Signôr duncje no nus judicarà fasint stât su la nestre declarazion di jessi catolics o praticants, ma sul amôr. Chest al vâl par ducj, il judizi al sarà par ducj e nol sarà dome pai cristians.

Ma al è un aspjet particolâr pal cristian, par cui ch'al scolte il Vanzeli. In fat, fintant che cheste storie evangjeliche no jere stade scoltade di nissun, la umanitât e podeve jessi considerade dividude in dôs categoriis: chei ch'a amin, ch'a àn misericordie e chei che no amin e no àn misericordie, ma dutis dôs lis categoriis sence savê che il destinatari dal lôr amôr o no amôr al è Jesù. Ma tal moment che chest Vanzeli al è stât proclamât, acetât dal dissepul, dal cristian, e nas une tierce categorie: chei che aromai a san che tal bisugnôs al è Jesù.

Il cristian al sa: chest lu responsabilize e lu sosten di plui. Al vignarà judicât ancje lui sul amôr, ma al podarà frontâ cun fidance

un judizi esigjent parcè ch'al sa che tal bisugnôs, ch'al varà judât o refudât, al è Jesù.

E je une altre pagine dal Vanzeli, simpri secont Mateu, al cjapitul 5, ch'e descrîf une vore ben il cristian. Si trate da la afermazion di Jesù: «Vô o sês il sâl da la tiere, vô o sês la lûs dal mont». Jesù nol dîs che o dovìn diventâ sâl e lûs, ma che come cristians o sin sâl da la tiere e lûs dal mont. Chel che nus pues capitâ al è di pierdi il savôr e di fâ lâ al mancûl o parfin distudâ la lûs. E duncje pierdi il sens di nô stes.

Parcè che la lûs no servìs se no ilumine altris, il sâl nol à sens se nol da savôr a altri. Ve cuâl ch'al è il compit dal cristian, il significât da la sô esistence di vivi cun tante semplicitât, te cuotidianitât e cun ducj i limits e i pecjâts, però ancje cun tante gaudie. O lin a Messe di domenie par no pierdi il savôr e par tignî impiade la lûs.

Cemût jessi sâl e lûs? Mi permet di sugjerî cualchi ambit di vite normâl, cuotidiane là che chest si realize. O ai za ricuardât l'essenziâl co mi riferivi al judizi finâl, o sei che la vite di ducj, e in particolâr dal cristian, e dêf jessi caraterizade dal amôr. La storie dal Vanzeli di Mateu e insist sore-dut sul esercizi di chês che po la tradizion da la Glesie e definissarà lis "oparis di misericordie", sedi corporâls sedi spirituâls. E esist in fat la fam fisiche ma e esist ancje la fam di veretât, di valôrs, di culture. Si à la la nuditât fisiche, la mancjance di vistiaris,

**Une cuistion
di lûs
e di savôr**

**Lis oparis
di misericordie
e la dignitât
di fis di Dio**

ma al esist ancje il dispueament da la proprie dignitât. E esist la malatie fisiche, ma e je ancje la malatie spirituâl in dutis lis sôs tremendis formis. E vie indevant. A son tantis duncje lis occasions che si presentin te vite cuotidiane par cjapâ sul seri e meti in pratiche lis indicazioni di Jesù sul judizi universâl.

O ai po mutivât ancje la necessitât di tratâ l'altri come persone. Simpri il toc dal Vanzeli dal judizi nus fâs capî che a la base di chest procedi e dêf jessi la cussience che in chel altri e je la presince di Dio, dal Fi di Dio, di Jesù. La prime pagjine da la Biblie, in fat, nus dîs che ogni om, ogni femine – sence lassâ fûr nissun – a son stâts creâts a imagjin e someance di Dio, destinâts ducj a vê la dignitât di fi di Dio.

Cun di plui, o riten che si è in podê di descrivi come che un cristian adult al puedi jessi tâl te vite cuotidiane fasint riferiment al sens di “responsabilitât”, une carateristiche ch’è cualifiche e e diferenzie la etât adulte di chê da la infanzie e da la adollescence. O sin purtrop intune societât “adolesenziâl”: espressions come un “fantat o une fantate di cuarante agns” a son significativis par indicâ gjenerazions che no vuelin diventâ adultis. L’adult, invezit, al è une persone “responsabile”: al met in zûc la sô libertât, al sa rispuindi in maniere fedêl a lis provocazions e a lis sfidis da la realtât e par tant si fâs caric da lis consequencis. La fede stesse e je une siele di libertât. Tal Vanzeli Jesù al dopre spes espressions che a tachin

**Il cristian “adult” e
la responsabilitât**

cul “se”: “Se tu vuelis vignî, se tu vuelis stâmi daûr, se o varês fede...”. Si puedin indicâ un pôcs di ambits dulà che il cristian adult al esercite la sô responsabilitât di dissepul di Jesù.

Un prin ambit al è la famee. Cheste e je l’ambient dulà che lis personis a puedin stimâsi, judâsi a vivi, cressi, sedi pûr cu lis fadiis, i limits, lis strachis che ogni famee e sperimente. Il Concili Vatican II nol à vût pôre di afermâ che la famee “si podarès clamâ Glesie domestiche” (*Lumen gentium*, n. 11) e pape Francesc te sô esortazion su la gaudie dal amôr al à mostrât cemût vivi in famee l’amôr descrit di san Pauli tal famôs imni a la caritât (*Prima Corinti*, cjav. 13; *Amoris laetitia*, nn. 90-119).

A proposit da la famee o volarès spindi dôs peraulis su la propueste cristiane ai fîs. La lagnance, fin monotone, che ducj i catechiscj e lis catechistis a pandin in maniere sistematiche e je che i fruts a scomencin il percors dal catechisim sence savê fâ nancje il segn da la crôs. Chest al significhe che quasi ducj dopo il lôr Batisim no àn plui vût o quasi la pussibilitât di vivi te lôr famee la esperience religjose, di cognossi Jesù, di cognossi Marie, di imparâ lis preieris plui simplicis, di imparâ i valôrs dal Vanzeli. La impression e je che spes ancje tes fameis là che i gjenitôrs a son cristians, dulà che in ogni câs a batiin i fîs e ju iscrivin po al catechisim, al sedi un cidin complet a proposit dal aspjet religjôs. Po stâi che chest “cidin” al segnali une mancjance

**Jessi cristian
responsabil
in famee**

di atenzion ancje personâl viers la fede (ma chest nol dovarès sucedi par cui ch'al è almanco un "cristian da la domenie"), o ben un adatâsi al mût di vivi atuâl, dulà che al somee cuasi maleducazion fevelâ di fede e di religjon. Po stâi ancje che disot e sedi une concezion falade da la libertât dai propriis fîs. Al è ben vêr che la siele da la fede e dêf jessi une siele libare, ma come che si propon ai propriis fîs, ancje co a son piçui piçui, chel che nus somee ben par lôr, chel che o sintin come impuartant, chel che nus stâ a cûr e no spietin che a sedin grancj par insegnâur, par esempi, la nestre lenghe o la nestre culture e i nestris valôrs, cussì al dovarès jessi normâl proferîur une cognossince e une prime esperience di Jesù. Di grancj po a saran lôr a decidi se confermâ o no il don da la fede, se acetâ o no la testimoneance di fede ricevude in famee o se refudâle.

I fruts no dovaressin alore spietâ il catechismo par sintî fevelâ di Jesù, ma a dovaressin vêlu za cognossût come une presince familiar dentri da lis lôr cjasis traviars lis peraulis e il compartiment dai gjenitôrs (come lâ a Messe di domenie, naturalmentri ancje, se pussibil, cui fruts). No si trate dome di fevelâ di Jesù e di fâ cognossi i episodis dal Vanzeli, che i fruts a scoltin simpri cun tante curiositât e disponibilitât, ma di trasmeti i valôrs dal Vanzeli intun clime di amôr e di fidance e cun sieltis concretis (se o puedi permetimi un piçul esempi da la mê infanzie, o dêf ricognossi che o ai imparât a dâ abade ai fruts puars cuant che a nô cuatri

fradis nus vignive dit a Nadâl che o dovevin decidi di dâ un nestri regâl a cualchi frut plui puar di nô).

Un secont ambit di responsabilitât come cristians adults al è chel dal lavôr. Un ambient là che, come che o disevi parsore, si dêf jessi atents ai altris, tratantju come personis, e vivi cun coerence i propriis valôrs. Il lavôr al è però prin di dut un ambit dulà realizâ la nestre umanitât, la nestre colaborazion a la societât e al svilup dal mont, rindint visibil il talent che Dio nus à donât a servizi dal prossim e come colaborazion a la sô opare creadore.

A esistin, sigûr, lavôrs cuntune cjarie di umanitât plui fuarte par vie che a son dreçâts in maniere direte a la persone (lavôrs in ambit educatîf, sanitari, assistenziâl, e v.i.). Ma ancje chei altris mistîrs, fin chei plui inteletuâi e astrats o chei plui manuâi e ripetitîfs, a àn in ogni câs un lôr sens.

O ricuardi che un pâr di agns indaûr mi jeri comovût leint une letare che mi veve mandât une zovine siore ch'e doveve fâ la Cresime di adulte. Mi veve scrit che intant da la preparazion al sacrament e veve capît che il so mût di jessi cristiane e jere chel di fâ bielis chês altris feminis cul so mistîr di paruchîr par siore. E veve capît dut.

Un altri ambit di responsabilitât al è chel viers la societât. O sin intun timp là che un pôc ducj a cirin di sghindâ lis responsabilitâts (o almancul di tutelâsi cuntune assicu-

**Jessi cristian
responsabil tal lavôr**

**La responsabilitât
viers la societât**

razion, se propi a devin cjàpâ sù il caric di cualchidune) e di criticâ in ogni câs cui che lis à soregut tal cjamp aministratîf e politic. Il cristian invezit, su la fonde, clâr, da lis sôs capacitâts, da lis concretis disponibilîtâts e da lis occasions che la vite i ufrîs, al dêf cjàpâ sù il caric da lis responsabilitâts che i competin viers i altris, viers la societât, viers il ben comun. Chest al pues sucedi tal ambit dal lavôr, da la scuele, da la economie, da la aministrazion, da la politiche o ancje dome dal propri cuartîr o dal condomini là che si è a stâ. E simpri cuntun spirt di servizi, dal don e da la gratuitât e no cuntune logjiche di podê.

Simpri cun riferiment a la responsabilitât sociâl, un aspjet une vore impuartant di vivi, soregut cumò, al è chel di contribuî a une corete opinion publiche. No intint riferîmi al lavôr dai gjornaliscj, ma a l'opinion che si nudrîs di cjacaris al bar o dal paruchîr (ma cumò ancje sui *social network*) e ch'e determine il mût di sintî da la int. Al è impuartant, prin di dut dentri di nô, maddressi cognossincis e convinziions no semplicistichis, emotivis, plenis di prejudizis. La realtât e je simpri molteplice, i problemis a àn tancj aspiets, lis soluzions spes no son facilis di cjàtâ ni, tant mancûl, di meti in pratiche.

Il jessi cristians no nus rint personis che a àn soluzions prontis te sachete par dut e par duçj (ciertis manieris di mostrâsi cristians che si identifichin cu la veretât, a viodin dome nemîs e a son prontos a condanâ cui

**Contribuî
a une opinion
publiche di pàs**

che no le pense compagn, tacant dai fradis e da lis sùrs di fede – e ancje il pape –, a fasin un dan grivi a la Glesie). Ma cun pazienze e competence, fasint stât sui valôrs dal Vanzeli e sul rispjet da lis personis, al è pussibil judâsi un cun chel altri a no resonâ in maniere semplicistiche, a rispjetâ la dignitât da lis personis, a no pensâ condizionâts dai prejudizis o classificant i singui individuîs in categoriis.

Chest al è un lavôr concret par la pâs. Dal dut indispensabil tal mont di vuê, segnât di problematichis gravis e spes gnovis: vueris, violencis, terrorisim, fam, malatiis, miserie, tensions sociâls (ancje par motîfs religjôs), crisis economichis, disastris ecologjics, grandis migrazions.

Infin un ultin ambit di responsabilitât che di pôc pape Francesc nus à reclamât (cf l'encicliche *Laudato si'*) al è chel viers il creât, viers l'ambient là che o sin. Une realtât ch'e je un don di rispjetâ, condividi e valorizâ par podê consegnâ chest mont intat e, se al è pussibil, miorât a lis gjenerazions futuris. Un disponisi a vivi ogni dì, li dulà che o sin, metint in pratiche chê che pape Francesc al à clamât la "ecologjie da la vite cotidiane", che no rivuarde dome il rispjet da la nature, ma e consist tal tignî di cont da la cualitât dai ambients di vite e da lis relazions di svilupâ in chei.

O scrivevi parsore che si va a Messe la domenie par no distudâ la lûs e par no pierdi il savôr dal nestri jessi cristians. La do-

**La responsabilitât
viers l'ambient**

**La domenie: zornade
da la Eucaristie e da la
comunitât cristiane**

menie pal cristian e dêf caracterizâsi par la celebrazion da la Eucaristie dulà puartâ al Signôr la setemane vivude, fidâi chê che nus spiete, scoltâ la sô Peraule, nudrîsi dal so Cuarp te Comunion par imparâ di Lui a vivi il don di se stes ai altris te concretece da la vite cuotidiane. No si va però a Messe in maniere individuâl. La Messe e je celebrade da la comunitât cristiane e ancje se no si àn compits dentri da la comunitât stesse – no par mancjance di gjenerositât, ma di timp o di pussibilitât concrete –, chest nol vûl dî che si è estranis al event. Il cristian si cjate “a cjase” in ogni lûc dal mont dulà ch’è je la Glesie, ma al aparten in ogni câs a une comunitât precise (in gjenar la parochie dulà ch’al è a stâ o che al frecuente par solit). La domenie e dovarès jessi alore l’ocasion no dome par la celebrazion da la Messe, ma par vivi ancje la dimension comunitarie dal jessi cristians cun moments di acetazion, di incuintri, di fraternitât, di condivision, di formazion, di fieste.

O soi daûr a concludi cheste letare, ma mi somee just che come che prime o ai dât spazi a un pussibil dialic cul siôr Mario, lu dedi cumò ancje a jê, siore Clare. Le scolti. *«Grazie. Lui, cjâr vescul, fasint riferiment a une sô pussibile interlocutore sul principi di cheste letare, al à imagjinât di rivolzisi a une mari tor i cuarante agns, a une bisnone otantine, a une studentesse universitarie di vincj agns. Probabil che lu deludarai e no tant par la mê età, cincuante agns. O ven a*

**La siore Clare,
une cristiane a metât?**

Messe cuasi dutis lis domeniis in domo. Forsi mi à viodût cualchi volte, ma di sigûr no si è acuart – e je ancjemò tante int, massime co al celebre il vescul – che no voi mai a fâ la Comunione, parcè che o soi une femine divorziade e ri-sposade. La mê e je une storie dolorose, come chê di tantis altris feminis. Mi soi sposade vonde zovine, o ai invistît un grum sul gno matrimoni. Pai prins 4-5 agns, pûr cuntun sù e jù, lis robis a son ladis vonde ben cun me marît; a son nassûts ancje doi fîs. Gno marît al jere spes in zâr, al lavorave, anzit lavore ancjemò, come rapresentant di cumierç. A un ciert pont al à tacât a jessi simpri plui lontan di cjase, a stâ vie par diviers dîs, a tornâ tart cuant che al jere in citât... . Insome no i à volût trop par capî che al veve un'altre. Ancje se i nestrîs fruts a jerin ancjemò piçui, la frute cinc agns e il frutin doi agns e mieç, a la fin mi à lassade. Al pues imagjinâ che il mont mi è colât aduès. Ancje se o jeri cressude intune famee cristiane e lade a scuele da lis muinis, mi soi sintude bandonade, mi mancjave fin il flât (dopo une serie di controis, il miedi al veve capît che al jere dome stress). Mi soi rabiade, tant. Ciert cun gno marît che mi veve tradît, ma ancjemò di plui cul Signôr. Però dopo un an di sconfuart e di disperazion o soi lade a cirî la muinie, ch'e faseve la portinarie te mê scuele e cun jê, di frute, spes mi confidavi. O ai vaiût par dut un dopomisdì e in cualchi maniere o ai capît che no podevi bandonâ il Signôr parcè che Lui – no savevi cemût – al jere presint te mê vite.

O ai cirût di tirâ indevant come che o podevi (ancje cun problemis economics), di stâi daûr come che o rivavi ai miei fîs, Jade e Mateu, di mantignî in ogni câs l'impegn da la Messe la domenie a pene pussibil cui fruts piçui. Mi sintivi tant sole e dopo cualchi timp o ai cjatât une persone, un coleghe di lavôr, ancje lui divorziât, un om bon, atent e ben viodût ancje dai miei fîs. Insieme a la fin dopo il divorzi si sin sposâts civilmentri. A son cuindis agns che o sin insieme. Lui nol è crodint, ancje se al è une vore rispietôs tai confronts da la mê fede: cualchi volte al ven ancje a Messe. Lui no sint la soference che o sint jo: cuant che Jade e à fat la prime Comunione o ai podût fâ ancje jo la Comunione; ma cuant ch'e je stade la volte di Mateu o jeri aromai divorziade e sposade di gnûf e no ai podût lâ dongje dal altâr. O soi une "cristiane da la domenie", ma mi sint une cristiane a metât».

Cjare siore Clare, no si è mai "cristians a metât", si è dome cristians. Ognidun cul so percors – di solit no tant lineâr... – cu lis propriis fadiis, i propriis fai, i propriis pecjâts, ma ancje lis propriis aspirazions, i propriis desideris, lis propriis sperancis. Il Signôr nus vûl ben come che o sin, nol bute vie nuie da la nestre vite, ancje lis pagjinis plui neris, chês plui dolorosis o ancje chês plui gramis. Nus vûl ben e al ricognòs simpri in filigrane te nestre vite la sô imagjin e someance, il nestri jessi fîs e fiis di Dio. Par chest jê e fâs ben a continuâ a partecipâ

**Semplicementri
cristians amâts
di Dio**

a la Messe da la domenie, sence sintîsi taiade fûr. Ancje la comunitât cristiane no je autorizade a condanâ o a sierâ fûr cualchidun ni par amôr da la veretât ni, piês, par amôr da la sô presumude purece.

Ma o sai ch'e je in jê une domande ch'e sarès injust de bande mê eludi: cui ch'al è divorziât e sposât di gnôf vivial simpri e in ogni câs intun stât di lontanance di Dio e da la Glesie? Pape Francesc al à clamât dongje doi sinodis dai vescui e al à scrit po une esortazion apostoliche no dome par frontâ chest probleme, ma par presentâ, te materialitât e te complicazion da la vite di vuê, la bielege dal amôr coniugâl e da la vite familiâr. Nol à però ignorât lis situacions problematichis come chê che jê e je daûr a vivi e al à parferît no ricetis prontis, ma pitost al à mostrât la vie da la savietât parcè che ogni situazion no je un "câs" astrat ma e à la muse di personis concretis cu lis lôr storiis, lis lôr responsabilitâts, i lôr percors devant di Dio, lis lôr cussiencis. Bisugnarès ripuartâ ca in maniere complete gran part dal document di pape Francesc. Mi limiti a ripuartâ cualchi rie da la esortazion apostoliche *Amoris laetitia* che no à bisugne di coment, parcè che o vuei dome dîi ch'e je une strade vierte di percori. Le invidi po, siore Clare, a lei di persone chel che al à scrit il pape e a fâ un vêr lavôr di discerniment su la sô situazion, cul aiût di un predi o dut câs di une guide spirituâl.

Al scrîf pape Francesc: «*Ai divorziâts che a*

**Lis indicacions
di pape Francesc
pai divorziâts
sposâts di gnôf**

vivin une gnove union, al è impuartant fâur sintî che a son part da la Glesie, che “no son scomunicâts” e tratâts come tâi, parcè che a formin simpri la comunion ecclesiâl. Chestis situazions a pretindin un atent discerniment e un acompagnament di grant rispiet, evitant ogni espression e mût di fâ che ju fasi sintî discriminâts e promovint la lôr partecipazion a la vite da la comunitât» (n. 243). «Si trate di integrâ ducj, si dêf judâ ognidun a cjatâ la maniere di partecipâ a la comunitât ecclesiâl, par che si sinti ogjet di une misericordie “no meretade, incondizionade e a gratis”. Nissun al pues jessi condanât par simpri, parcè che cheste no je la logjiche dal Vanzeli! No mi riferis dome ai divorziâts che a vivin une gnove union, ma a ducj, in cualsisei situazion si cjatadin» (n. 297). «I divorziâts che a vivin une gnove union, par esempi, a puedin cjatâsi in situazions une vore diviersis, che no devin jessi catalogadis o sieradis dentri in affermazions masse rigjidis sence lassâ spazi a un just discerniment personâl e pastorâl» (n. 298). «Il colocui cul predi, “in foro interno” [o sei tal sacrament da la confession o dut cês in maniere risiervade], al concor a la formazion di un judizi coret su chel che al impedîs la pussibilitât di une plui complete partecipazion a la vite da la Glesie e sui pas che a puedin favorîle e fâle cressi (n. 300). «Bisugne favorî la maturazion di une cussience iluminade, formade e acompagnade dal discerniment responsabil e seri dal pastôr, e proponi une fede simpri plui grande te grazie. Ma cheste cussience

e pues ricognossi no dome che une situazion no rispuint in maniere imparziâl a la propueste gjenerâl dal Vanzeli; e pues ancje ricognossi cun sinceritât e onestât chel che pal moment al è la rispueste gjenerose che si pues ufrî a Dio, e scuvierzi cuntune cierte sigurece morâl che chê e je la donazion che Dio stes al sta domandant jenfri la complessitât concrete dai limits, si ben che no sedi ancjemò dal dut l'ideâl efetîf» (n. 303).

O conclût cheste letare al “cristian da la domenie”. Tornant a leile o ai imagjinât une obiezion che la siore Clare e il siôr Mario, che mi soi rivolt sul principi e cun lôr o ai dialogât, a podaressin fâ: “Cjâr vescul, lui al voleve rivolzisi a ducj chei che, come nô, a frequentin cuntune cierte regolaritât la Messe da la domenie. O vin preseât che si vedi sfuarçât di metisi in dialic cun personis concretis che a apartegnin a diviersis categoriis. Ma no a dutis. Par esempi, no si è rivolt ai zovins, che, al è vêr, no frequentin tant, ma – lu varà sperimentât la Istât stade partecipant a la “Zornade Mondîâl da la Zoventût” a Cracovie – che si interoghin su la fede, su Dio, su lôr stes, su la Glesie. Lu savìn viodint e scoltant i nestris fîs: par lôr partecipâ a la Messe da la domenie no je plui come une volte il “minim sindacâl” par che un al podedi dîsi cristian, ma – sal augurìn – un travuart di rivâ traviers un percors di convinzion personâl. Nol à nancje scrit une peraule par lis personis “single”, sedi par sielte o plui

Fîs amâts

spes par câs da la vite: o cognossin tantis.
O ancje par chei che no àn, come nô, il don di jessi gjenitôrs. Al à fat po dome une alusion ai pensionâts, che pûr a costituissin la plui part da lis nestris assembleis parochiâls. E, forsi ancjemò plui grivi, nol à fevelât di cui che al vîf formis di disabilitât e cun fadie, in grazie dal jutori di chei di famee e di amîs, al câr di jessi fedêl al apontament da la domenie". Al è vêr, no ai ricuardât chestis personis e di sigûr tantis altris: o volevi dome scrivi une letare par inviulâ une riflession, no ciert un tratât. O imagjini che cui che no si sintarà citât ca, nancje in maniere indirete, al podarà in ogni câs aplicâ a la proprie situazion se no altri cualchidune da lis considerazions tratadis. O puedi però sigurâ che te preiere e soledut te celebrazion da la Messe o câr di ricuardâmi di ducj. Il Signôr in ogni câs nol dismentee nissun e par Lui ogni om e ogni femine a son un fi e une fie amâts te lôr individualitât. E al è chel che al conte.

Un ultin pinsîr mi cjape o forsi un desideri: po stâi che chest scrit al finissi tes mans ancje di cui che al è cristian ma aromai nol partecipe plui nancje a la Messe da la domenie. Magari par semplice cumbinazion o parcè che i è stade dade dal plevan, cuant che al è lât notâ il propri fi al catechisim, o ancje parcè che – e chest al sarès il gno insium – i è stade consegnade di un amî, di une amie.

I motîfs che a fasin pierdi la pratiche religjose a puedin jessi tancj: a son chei che a

**Il misteri
di ogni persone**

àn vût une educazion cristiane, ma a son jentrâts in crisi par une serie di resons teologjichis (dogmis ritignûts inacetabii, misteri dal mâl, conflit fede-sience...), etichis (posizions da la Glesie no condividudis sul abort, contracezion, unions omosessuâls...), eclesiâls (la famose afermazion “O crôt in Dio, ma no te Glesie”); altris, cun l’adolescence, a àn molât a pôc a pôc di lâ in glesie sence fâ une vere e proprie sielte ma un pôc lant daûr a ce che a fasevin chei altris; altris personis si son slontanadis a cause di dificultâts personâls: malatiis, corots, crisis familiârs. Tantis situazions diviersis, che dome Dio al cognòs. Mi auguri in ogni câs che la leture di cheste letare par cui che al fos in chestis condizions, e magari il dialic sclet e cordiâl cun cui che je à consegnade, a podedin no tant puartâ a “conversion” (che e je in ogni câs un don di Dio), ma pitost a fâ nassi o, miôr, a tornâ a dâ vôs a chês domandis profundis che a son tal câr di ognidun, in chel misteri di ogni persone che dome Dio al à il podê di jentrâ.

Suplement al numar 35/2016 di Voce Isontina
dai 17 di Setembar dal 2016.
Diretôr responsabil Mauro Ungaro